

山谷詩注


內集
別集
外集

十



山
谷
黃
絲
綢
圖
說
卷
一





山 谷 詩 注

內 集 外 集 別

(十)

黃 庭 堅 撰

叢書集成初編

(補印本)

山谷詩注

內集外集別集

十冊

一九三七年六月初版
一九五九年十月補印

黃庭堅撰

任史史
季
淵容温
注

商務印書館出版

上海大眾文化印刷廠印刷

山谷詩外集補卷四

答龍門潘秀才見寄

熙寧四年
葉縣作

男兒四十未全老。便入林泉真自豪。明月清風非俗物。輕裘肥馬謝兒曹。山中是處有黃菊。洛下誰家無白醪。想得秋來常日醉。伊川清淺石樓高。

寄張仲謀次韻

風力蕭蕭吹短衣。茅簷霜日淡暉暉。天寒塞北鴈行落。歲晚大梁書信稀。湖稻初舂雲子白。家雞正有蒼頭肥。割鮮炊黍庾前約。公事可來君不違。

客自潭府來稱明因寺僧作靜照堂求予作

客從潭府渡河梁。籍甚傳誇靜照堂。正苦窮年對塵土。坐令合眼夢湖湘。市門曉日魚鰕白。隣舍秋風橘柚黃。去馬來舟爭歲月。老僧元不下胡床。

雜詩七首

熙寧四年
葉縣作

此身天地一蘧廬。世事消磨綠鬢疎。畢竟幾人真得鹿。不知終日夢爲魚。

其二

營巢燕幾時休。在處成家春復秋。歲歲自來還自去。主人無厭客無求。

其三

館甥宮裏歎才難。當日同朝聽百官。光武早知堯舜事。只今那得子陵灘。

其四

少年不愛萬金身。歌舞尋春愁送春。滿眼紛華心寂寞。長安市上酒家人。

其五

薰爐茶鼎偶然同。晴日鴉啼柿葉風。萬事盡還麴居士。百年常在大槐宮。

其六

古屋清寒雪未消。小窗晴日展芭蕉。酸甘荔子嘗春酒。更碾新芽薦菊苗。

其七

碧窗涼簾唯便睡。露井無塵蔭綠槐。夢入醉鄉猶病渴。轆轤聲到枕邊來。

分甯本云。按管注。載第六首。公有真蹟云。比見師川。錄示諸賢和南塔題壁詩。甚愧老拙歎稅在前也。歸園計草中。有一篇與壁題異。不知壁間字是拙筆否。今錄主邪老。刮去手寫此篇。薰爐茶鼎暫時同。寒日鴉啼柿葉風。萬事須還麴居士。百年只在槐安宮。而第八

首元載第六卷題作武
陵今詳錄之以備觀覽

飲韓三家醉後始知夜雨

醉臥人家久未曾。偶然樽俎對青燈。兵廚欲罄浮蛆甕。饋婦初供醒酒冰。

予嘗醉後字水晶輪爲醒酒冰酒徒皆以爲知言。

只見眼前

人似月。豈知簾外雨如繩。浮雲不負青春色。未覺新詩減杜陵。

張仲謨許送河鯉未至戲督以詩

浮蛆瑛瑛動春醅。張仲臨津許鱸材。鹽豉欲催蓴菜熟。霜鱗未貫柳條來。日晴魚網應曾噉。風軟河冰必暫開。莫誤曉窗占食指。仍須持取報章回。

和答張仲謨泛舟之詩

雲容天影水中搖。分坐船舷似小橋。聯句敏於山吐月。舉觴疾甚海吞潮。興來活鱖牛心熟。醉罷紅鑪鴨腳焦。公子翩翩得真意。馬蹄塵裏有嘉招。

食瓜有感

暑軒無物洗煩蒸。百果凡材得我憎。蘇井筠籠浸蒼玉。金盤碧筴薦寒冰。田中誰問不納履。坐上適來何處蠅。此理一盃分付與。我思明哲在東陵。

道中寄公壽

熙寧五年自
葉赴北京作

坡地羸馬莫雲昏。苦憶兔園高帝孫。子舍芝蘭皆可佩。後房桃李總能言。鞦韆門巷火新改。桑柘田園春向分。病酒相如在行役。梁王誰與共清樽。

行邁雜篇六首

簇簇深紅間淺紅。苦才多思是春風。千村萬落花相照。盡日經行錦繡中。

其二

白白紅紅相間開。三三五五踏青來。戲隨胡蝶不知遠。驚見行人笑卻回。

其三

村落人家桃李枝。無言氣味亦依依。可憐憔悴蓬蒿底。蜂蝶不知春又歸。

其四

杏村桃塢春三月。少有人家不出遊。一顧雖無傾國色。千金肯爲使君留。

其五

滿院青楊吐白綿。未多柳絮解漫天。野人豈會斷優劣。只問牀頭沽酒錢。

其六

十日狂風桃柳休。常因酒盡覺春愁。泰山爲肉釀滄海。料得人間無白頭。

去賢齋

熙甯四年
葉縣作

爭名朝市魚千里。觀道詩書豹一斑。末俗風波尤浩渺。古人簾陛要躋攀。螭螭怒臂當車轍。鸚鵡能言著鎖關。顧我安知賢者事。松風永日下簾間。

粹老家隔簾聽琵琶

元豐二年
北京作

馬卿勸客且無喧。請以侍兒臨酒樽。粧罷黃昏簾隔面。曲終清夜月當軒。

一作一曲明妃愁夜月。數聲啄木響春山。借一韻。

絃絃不亂

撥來往。字字如聞人語言。千古胡沙埋妙手。

一作實。

豈如桃李在中園。

江南

元豐元年
北京作

夢寂江南未得歸。清波鷓子上鉤肥。五年身屬宮倉米。輸與漁人坐釣磯。

道中寄景珍兼簡庾元鎮

熙甯五年
北京作

傳語濠州賢刺史。隔年詩債幾時還。因循樽俎疎相見。弃擲光陰只等閑。心在青雲故人處。身行紅雨亂花間。遙知別後多狂醉。惱殺江南庾子山。

次韻景珍醢醢

莫惜金錢買玉英。擔頭春光過清明。天香國豔不著意。詩社酒徒空得名。及此一時須痛飲。已拚三日作狂醒。濠州園裏都開盡。腸斷蕭蕭雨打聲。

呈馬粹老范德孺

元豐二年
北京作

穎上相逢杏始青。爾來瓜壟有新耕。四時爲歲已中半。萬物得秋將老成。日永清風搖塵尾。夜闌飛雹落棊枰。兩廳未覺過從數。政以頑疎累友生。

謝張仲謀端午送巧作

熙寧四年
葉縣作

君家玉女從小見。聞道如今畫不成。翦裁似借天工手。萱草石榴偏眼明。

送張子列茶

齋餘一椀是常珍。味觸色香當幾塵。借問深禪長不臥。何如官路醉眠人。

三月壬申。同堯民希孝觀淨名寺經藏。得宏明集中沈炯同庾肩吾諸人游明慶寺詩。次韻奉呈二

公。就鳥道三層塔。菴固一重堂。副鳥逐猷磬。狎獸繞禪床。摘菊山無酒。然松夜有香。幸得聞高勝。於此靈□王。元豐二年北京作。

祕藏開新譯。天花雨舊堂。證經多寶塔。寢疾淨名牀。鳥語雜歌頌。蛛絲疑篆香。凝一作疑。同游得是李。談道過何王。

按此詩題下小字俱係舊本。其中似有舛訛未敢妄易。

雨過至城西蘇家。元祐元年
祕書省作。

飄然一雨洒青春。九陌淨無車馬塵。漸散紫煙籠帝闕。稍回晴日麗天津。花飛衣袖紅香濕。柳拂鞍韉綠色勻。管領風光唯痛飲。都城誰是得閑人。

謝仲謀示新詩。熙寧四年
葉縣作。

贈我新詩許指瑕。令人失喜更驚嗟。清於夷則初秋律。美似芙蓉八月花。采菲直須論下體。鍊金猶欲去寒沙。唐朝韓老誇張籍。定有雲孫作世家。

十月十五早飯清郡觀道遙堂

心遊魏闕魚千里。夢覺邯鄲黍一炊。蔬食菜羹吾亦飽。逍遙堂下葉辭枝。

紅蕉洞獨宿

熙寧三年
葉縣作

南牀高臥讀逍遙。真感生來不易銷。枕落夢魂飛蛺蝶。燈殘風雨送芭蕉。永懷玉樹埋塵土。何異蒙鳩掛葦苕。衣笮緹臺蛛結網。可憐無以永今朝。

分甯本云。按營注。此詩別本多有不同。其詩云。重簾複幕夜蕭蕭。真感生懷不自聊。枕落夢魂飛蛺蝶。燈殘風雨碎芭蕉。瓊枝玉樹埋黃土。衣笮緹臺閣絳綃。故物盡能回白首。斯人無以永今朝。

春雪呈張仲謀

熙寧四年
葉縣作

莫雪霏霏若撒鹽。須知千隴麥纖纖。夢闌半枕聽飄瓦。曉起高堂看入簾。剩與月明分夜砌。卽成春溜滴晴簷。萬金一醉張公子。莫道街頭酒價添。

和答劉太博攜家遊廬山見寄

元豐三年赴
太和道中作

緩轡松陰不起塵。嵐光經雨一番新。遙知數夜尋山宿。便是全家避世人。落日已迷烟際路。飛花還報洞中春。可憐不更尋源入。若見劉郎想問秦。

次韻伯氏戲贈韓正翁菊花開時家有美酒

熙寧四年
葉縣作

鬢髮斑然潘騎省。腰圍瘦盡沈東陽。茶甌屢煮龍山白。酒椀希逢若下黃。鳥角巾邊簪鈿朶。紅銀盃面凍糖霜。會須著意憐時物。看取年華不久芳。

答李康文

元豐二年
北京作

才甫經年斷來往。逢君軍馬慰秋思。幽蘭被逕聞風早。薄霧乘空見月遲。每接雍容端自喜。交無早晚在相知。深慙借問談經地。敢屈康成入絳幃。

送彭南陽

南陽令尹振華鑣。三月春風困柳條。攜手河梁愁欲別。離魂芳草不勝招。壺觴調笑平民訟。賓客風流醉舞腰。若見賢如武侯者。爲言來仕聖明朝。

送鄧慎思歸長沙

熙寧四年
葉縣作

鄧侯過我解新鞵。潦倒猶能似舊時。西邑初除折腰尉。南陔常詠采蘭詩。姓名已入飛龍榜。書信新傳喜鵲知。何日家庭供一笑。綠衣便是老萊衣。

從時中乞蒲團

元豐五年
太和作

織蒲投我最宜寒。正欲陰風雪作團。方竹火爐趺坐穩。何如矍鑠跨征鞍。

分甯本云。按此詩一題二首。前篇載外集。首句云。撲屋陰風雪。作團。後篇卽此本。是一首而句法改換不同。今仍其舊分編。

戲答諸君追和予去年醉碧桃

當時倒著接籬回。不但碧桃邀我來。白蟻撥醅官酒滿。紫綿揉色海棠開。

雪後登南禪茅亭簡張仲謀二首

熙甯四年
葉縣作

雪後憑高望洛都。萬峯遮眼白模糊。相將閬苑樓臺上。展盡山陰水墨圖。

其二

風入村墟搖酒旆。雲埋行徑罷樵蘇。狐裘年少宜追獵。正有飢鷹待一呼。

景珍太博見示舊倡和蒲萄詩因而次韻

熙甯五年北京
作景珍名合贖

映日圓光萬顆餘。如觀寶藏隔蝦須。夜愁風起飄星去。曉喜天晴綴露珠。宮女揀枝模錦繡。論

一作
師持

味比醍醐。欲收百斛供春釀。放出聲名壓酪奴。

喜念四念八至京

元豐八年都下改官作念四即非
熊念八諱仲堪字覺民公從弟

朔雪蕭蕭映薄幃。夢回空覺淚痕稀。驚聞庭樹烏烏樂。知我江湖鴻鴈歸。拂榻喜開姜季被。上堂先着老萊衣。酒樽煙火長相近。酬勸從今更不遲。

次韻伯氏寄贈蓋郎中喜學老杜詩

元豐二年
北京作

老杜文章擅一家。國風純正不欹斜。帝關悠邈開關鍵。虎穴深沈樣爪牙。千古是非存史筆。百年忠義寄江花。潛知有意升堂室。獨抱遺編校舛差。

蓋郎中惠詩有二強攻一老不戰而勝之嘲次韻解之

詩翁琢句玉無瑕。淡墨稀行秋鴈斜。讀罷清風生塵尾。吟餘新月度簷牙。自知拙學無師匠。要且強言遮眼花。筆力有餘先示怯。真成句踐勝夫差。

和呂祕丞

元豐二年
北京作

北海樽中忘日月。南山霧裏晦文章。清朝不上九卿列。白髮歸來三徑荒。車轍馬蹄疎市井。花光竹影照門牆。人間榮辱無來路。萬頃風煙一草堂。

雜詩四首

元豐二年
北京作

扁舟江上未歸身。明月清風作四鄰。觀化悟來俱是妄。漸疎人事與天親。

其二

佛子身歸樂國遙。至人神會碧天寥。劫灰沈盡還生妄。但向平沙看海潮。

其三

小德有爲因有累。至神無用故無功。須知廣大精微處。不在存亡得失中。

其四

黃帝煉丹求子母。神農嘗藥辨君臣。如何苦思形中事。憂患從來爲有身。

次韻子高卽事

熙寧八年
北京作

詩禮不忘它日問。文章未覺古人疎。青雲自致屠龍學。白首同歸種樹書。綠葉青陰啼鳥下。游絲飛絮落花餘。無因常得杯中物。願作鴟夷載屬車。

次韻寄藍六在廣陵

崇寧二年自鄂赴宜州作

聖學相期滄海頭。當時各倚富春秋。班揚文字初無意。滕薛功名自不優。焦尾朱絃非衆聽。南山白石使人愁。傳聲爲向揚州問。相憶猶能把酒不。

再和寄藍六

南極一星淮上老。承家令子氣橫秋。萬端只要稱心耳。五鼎何如委吏優。海燕催歸人作社。江花欲動雨含愁。追思二十年前會。棠棣飄零歎鄂不。

歎鄂不一作歎白頭。頃賊廉叔諸兄游。今皆凋落。星華按頃賊二字當有誤。原本如是故仍之。

戲書效樂天

熙寧四年葉縣作

造物生成嵇叔嬾。好人容縱接輿狂。鳥飛魚泳隨高下。蟻集蜂衙聽典常。母惜此兒長道路。兄嗟子弟困冰霜。酒壺自是華胥國。一醉從他四大忙。

余成詩

井序熙寧四年葉縣作

役者余成。忠信不二。執鄙事八年。未嘗見其過。其畏得而好德。畏不善而慎罰。躬行而心安樂。問其部伍。蓋自其少時。至於今。行年六十矣。猶一日也。察其私持廉甚。謹而遠名。吾嘗與僚友論其